

# Midadas persunalas tar Samedia

Thomas Kundert daventa successur dad Andrea Masüger sco schef operativ

■ **Thomas Kundert (36) surpiglia quest'emna il presidi da la direzziun da Samedia sco nov schef operativ. Il CEO partent Andrea Masüger (61) surpiglia in mandat parzial sco manader publicistic da la part surregiunala da nossas gasettas quotidianas. Il cussegl administrativ ha plinavant designà Susanne Lebrument (46) sco delegada dal cussegl administrativ.** En las medias svizras stattan l'ultim temp dus champs d'activitad en il center. Sin l'entira lingia dal martgà d'inserats e da reclama han ils titels da print pers volumen e retgavs. En la sparta schurnalistica han bleras gasettas stgaffi in mantè cuminaivel per las spartas exteriur, intern, economia e cultura. Las gasettas han tschertgà partenaris per realisar e publicitar cuminaivlamain ina redacziun ed ina purschida schurnalistica. Samedia, ina da las paucas chasas da medias ch'èn restadas independentas, ha tschernì in'atgna via. In dals pli capabels enconuschiders dal martgà da reclama e d'utilisaders, *Thomas Kundert*, surpiglia la direzziun da l'entir concern da Samedia. L'accent principal furma la sparta ch'elavura las entradas las pli essenzialas da nossa interpresa. Kundert – sco substitut dad *Andrea Masüger* – è sa preparà du-

rant lung temp sin sia nova incumbensa.

Sin champ schurnalistic avain nus examinà durant lung temp ina cooperaziun surregiunala cun differentas chasas da medias. Ina soluziun adattada n'avain nus dentant anc betg chattà. Tscherts moviments entaifer il circol da lecturas e lecturs han evotgà discurs cun la «Basler Zeitung». Nus essan la finala sa decidids en favur d'ina soluziun independenta. En la partiziun da la schefredactura *Martina Febr* vegn furmada ina redacziun surregiunala sut il timun da Masüger. Masüger, ch'è stà engaschà sco schef da la redacziun da la chasa federala e dispona uschia sco anteriur schefredactur durant blers onns d'ina gronda experienza, resta vinavant en il cussegl administrativ da Samedia.

Masüger resta vinavant commember dal cussegl administrativ da nossa interpresa Samedia Press SA e represchenta Samedia en l'Associazion Medias svizras ed è en il medem mument commember da la cumisssiun federala da medias. Masüger (61) vegn a star a disposiziun vinavant a Samedia per intgins mais.

Il cussegl administrativ ha plinavant decidì d'installar ina delegada per las radund otg interpresas che la societad posseda. Ella è

s'occupada fin uss cunzunt en la vendita dals products. Quest nov post è vegnì surdà a *Susanne Lebrument* ch'è stada engaschada fin uss fermamain en la vendita.

Nus engraziaian ad Andrea Masüger, Thomas Kundert e Susanne Lebrument per la lavur prestada fin quà e giavischain ad els en lur nova incumbensa blier success e satisfacziun.

*Hanspeter Lebrument,*  
parsura dal cussegl administrativ ed  
editur Samedia

## Nadia Müller-Calabrese – nova manadra da reclama

Cun il 1. da fanadur surpiglia *Nadja Müller-Calabrese* la gestiun da la Samedia Promotion. L'actuala substituta da Thomas Kundert è en l'avegnir responsabla per las spartas martgà da reclama e per la vendita da la reclama da las gasettas, dal radio, da la televiun e dad online da Samedia. La sparta martgà d'utilisaders vegn dirigida vinavant dad *Andreas Hartmann*.



Il directori da Samedia: il nov CEO Thomas Kundert, il CEO partent Andrea Masüger, l'editur Hanspeter Lebrument e la delegada dal cussegl administrativ Susanne Lebrument.